



## DIPOTSO LE DIKARABO KA LENANEO LA HO INGODISETSA HO ENTELWA COVID-19 KA MOKGWA WA ELEKTRONIKI (EVDS)

- 1. Ke tlameha ho etsa jwang haeba e se e le nako e telele ke ingodisitse ka mokgwa wa EVDS empa ke e so fumane molaetsa o mpoellang hore ke tla entwa neng?**

Haeba o ingodisitse, jwang kapa jwang nako ya hao e tla fihla. Re bolokile dintlha tsa hao, hang ha sebaka se hlaha setsing sa ho entela se haufi le wena, o tla fumana SMS. Re kopa o be le mamello; ha ho motho ya tla sala kantle letsholong lena la ho enta setjhaba.

- 2. Ke tlameha ho ema nako e kae pele ke fumana letsatsi la ho entwa?**

Palo ya ditsi tsa ho entela sebakeng sa heno ke yona e laolang hore o fumana neng SMS e o tsebisang ka letsatsi la hao la ho entwa. Ho na le ditsi tse ntjha tse ntseng di bulwa jwalo ka beke, mme sena se tla thusa hore batho ba phakise ho fumana matsatsi ao ba tla entwa ka ona.

- 3. Ke etsa jwang haeba ke ingodisitse ka mokgwa wa EVDS empa ke sa fumana molaetsa o netefatsang hore ke ingodisitse?**

Ka mora ho ingodisa ka mokgwa ona wa EVDS, o tlameha ho fumana SMS e o netefaletsang hore o ingodisitse mme jwale o emetse ho fumana letsatsi la ho entwa. Haeba o so ka o fumana SMS ena, re kopa o boele o kene ho [vaccine.enrol.health.gov.za](http://vaccine.enrol.health.gov.za) hape ho lekodisisa hore na dintho di tsamaile hantle ka hore o boele o kenye nomoro ya hao ya boitsebiso.

- 4. Ke etsa jwang haeba ke ingodisitse pele ho bohle empa ke e so bolellwe hore ke tla entwa neng?.**

EVDS e sebetsa ka tsela e tshwanang bathong bohle, ba lekala le ikemetseng le lona la mmuso. Ho fumana sebaka ho ya ka hore ditsi di kae sebakeng sa heno. Re ka etsa mohlala ka hore, haeba o dula sebakeng se nang le ditsi tse ngata, o tla fumana letsatsi la ho entwa pele ho motho ya dulang moo ho nang le ditsi tse mmalwa.

Ho boetse hape ho ye ka hore o kgethile nako e fe, ya hoseng kapa ya mantsiboya, ya hara beke kapa mafelong a yona. Basebeletsi ba tsa Bophelo bo Botle le bona ba ntse ba entwa mme bona ba tla thuswa pele ho bohle e le ho netefatsa hore ba lwantsa COVID-19 ena ba sireletsehile.

- 5. Ke ingodisitse le ba *medical aid* wa ka hore le nna ke batla ho fumana ente; na ke ntse ke tlameha ho ingodisa ho EVDS?**

Khamphane tse ding tsa *medical aid* di tla o kopa hore o boele o ingodise le ho tsona e le hore di tle di tsebe hore di o romelle dintlha mabapi le ho entwa. Leha ho le jwalo, o ntse o tlameha ho ingodisa ho EVDS. Ena ke yona feela tsela ya hore o kgone ho entwa, ho sa natsehe hore o entelwa setsing se ikemetseng kapa sa mmuso kapa hona o na le *medical aid*.

**6. Ke na le *medical aid*; na le nna ke tlameha ho latela lenaneo la mmuso?**

*Medical aid* wa hao o ntse o tlameha ho latela mehato yohle ya ho enta setjhaba e behilweng ke Lefapha la Bophelo bo Botle.. *Medical aid* di dumeletswe feela ho enta batho ba dilemo tse itseng jwalo ka ha Lefapha la Bophelo bo Botle le phatlaladitsi. EVDS e tla o botsa hore na o na le *medical aid*. Haeba o na le yona, o tla tlameha ho kenya lebitso le nomoro ya yona. Re tla leka ho o beheletsa sebaka setsing se ikemetseng (haeba se le teng haufi le moo o dulang kapa o sebetsang teng) empa o ka nna wa romelwa ho sa mmuso.

**7. Nka etsa diphetoho jwang ho EVDS haeba ke fetotse aterese?**

Kena ho EVDS mme o kenye dintlha tse ntjha. Dintlha tsa hao di ke se phetehe habedi ha feela o sebedisa nomoro e tshwanang ya boitsebiso. EVDS e tla sebedisa nomoro ya hao ya boitsebiso ho tlatselletsa dintlheng tsa hao. EVDS e entswe hore e dumelle ho etsa diphetoho le ho tlatselletsa dintlha tsa hao.

**8. Na nka ya setsing se sele ho ena le seo ke laetsweng ho ya ho sona?**

Re kgothaletsa bohle ba fumaneng melaetsa e ba laelang moo ba tlamehang ho entelwa teng hore ba ye ditsing tseo. Ho etsa jwalo ho tla netefatsa hore o a entwa hobane ente ya hao e tla be e se e o emetse.

Leha re ile ra ba le diphephetso tsa batho ba iphahlelang feela ntle le peheletso bekeng ya pele ya ho enta, lefapha le ile la kopa hore mokgwa oo o KGAOTSE. Lenaneo la kabo ya ente le laolwa ka tsela e hlokolosi haholo. Re netefatsa hore re isa diente tse lekaneng batho ba tla fihla setsing ka seng letsatsing ka leng.

Ho ya setsing seo o laetsweng sona ho tla etsa mosebetsi wa rona o tsamaye ka nepo. Ho tla thusa hape ho thibela "tshubuhlellano" ya batho setsing se le seng e leng se ka bakang ho ata ha tshwaetso.

**9. E tseba jwang EVDS hore ke tlameha ho ya setsing se fe?**

O tla laelwa ho ya setsing se haufi le aterese eo o e kentseng ya moo o dulang kapa o sebetsang teng. Dibakeng tsa ditoropong e tla o neha setsi se sa feteng dikilomitara tse 10 ho tloha moo o dulang kapa o sebetsang teng mme dibakeng tsa mahaeng teng tse sa feteng tse 30 ho tloha moo o dulang kapa o sebetsang teng. Nako eo o e kgethang ha o ingodisa jwalo ka ya hoseng kapa mantsiboya kapa hara beke kapa mafelong a yona, le yona e ba le kgahlamelo ho fumaneng sebaka ditsing tsa ho entela.

**10. Ho tla etsahala eng ha nka ikela feela setsing sa ho entela?**

Re ipiletsa ho batho bohle hore BA SE itlele feela ditsing. Ho ikela feela ditsing tsa ho entela ha ho bolelele hore o tla fihla o entwe hang hang. Ditsi tsa ho entela di ka thusa batho ba dilemo di 60 le ho feta ho ingodisa ka EVDS. Ho ingodisa e sa le nako ho inthanete, ke yona tsela e molemo ya ho ipeheletsa sebaka sa ho entwa.

**11. Ho tla etsahala eng ha nka se kgone ho ya setsing ka letsatsi leo ba mpalletseng lona?**

EVDS e tla o romella SMS e tla o tsebisa ka letsatsi le letjha leo o tlang ho entwa ka lona. O tla fuwa menyetla e meraro – e tla ba molaetsa wa pele le e meng e MMEDI. Ha ho etsahala o sa kgone ho tla le makgetlong ana a mang, o tla tlameha ho letsetsa mohala wa thuso ka *COVID-19* e leng 0800 029 999 mme o kope ho ngodiswa botjha. Dintlha tsa hao tsona di tla be ntse di le teng, bothata feela ke hore re tla be re sa tsebe hore ho etsahetse eng ka wena, o matsatsing a phomolo, o a kula kapa mohlomong o hlokahetse, ka hoo, re tla emela wena hore o ikopanye le rona.

**12. Ke tlameha ho etsa jwang ha ke se na ditokomane tsa boitsebiso?**

Lefapha la Bophelo bo Botle le sebetsana le tsela e tla dumella batho ba se nang ditokomane tsa boitsebiso ho entwa. Dintlha mabapi le tsela ena di tla phatlalatswa ka mora nako e sa fediseng pelo. Maikemisetso ke ho thusa melata yohle mmoho le Maafrika Borwa ohle a se nang mangolo a boitsebiso.

**13. Nka ingodisa jwang haeba ke se na inthanete?**

Bohle ba se nang inthanete kapa ona mohala wa *smartphone* ba ka ingodisa ka mokgwa wa SMS ka ho tobetsa \*134\*832\*o kenye nomoro ya hao ya boitsebiso morao o tobetse#, haeba o se na Nomoro ya Boitsebiso, tobetsa feela \*134\*832#. O ka ingodisa le ka *WhatsApp* ka ho romela lentsewe "REGISTER" nomorong e reng 0600 123 456. Ditshebetso tsa ho ingodisa ka SMS kapa *WhatsApp* ke mahala; ha ho *airtime* kapa *data* e hlokahalang.

Haeba o hloleha ho sebedisa mekgwa ena, o ka ya setsing sa bophelo bo botle mme o kope hore ba o thuse ho ingodisa. Baetapele ba bangata ba setjhaba (ba dikereke, dipolotiki, marena le borakgwebo) ba intshitse sehlabelo ba re ba tla thusa batho ho ingodisa ka inthanete. O ka kopa leha e le moahisane kapa motjha ya tsebang ka inthanete ho o thusa.

**14. Na ba dilemo tse ka tlase ho tse 60 ba ka ingodisa ka EVDS?**

Hang feela ha o kenya nomoro ya hao ya boitsebiso, EVDS e bala dilemo tsa hao mme e o bolellele hore dilemo tsa hao ha di o dumellele hore o ka entwa ha jwale. Lenaneo lena le sebedisa dilemo e seng bokulo ho sheba hore o tla entwa neng. Letona la tsa Bophelo bo Botle le tla phatlalatsa hore ke batho ba dilemo dife ba tla latela mokgahlelong o latelang.

Dipatlisiso di bontshitse hore dilemo ke tsona haholo tse behang motho kotsing ya hore a robatswe sepetlele kapa a shwe ka lebaka la *COVID-19* ho ena le bokulo. Bokulo hape bo atile haholo hona bathong bana ba seng ba hodile.

**15. Ho hlokahala eng hore ke ingodise ka EVDS?**

Ho ingodisa ka mokgwa wa EVDS, o tlameha ho ba le nomoro ya boitsebiso kapa ya paseporoto le nomoro ya karete ya *medical aid* (haeba o na le yona). Mohato wa pele e tla ba ho kenya dintlha tsa hao tse kang: Lebitso le Fane, Letsatsi la Tswalo, Bong, Aterese ya Imeili, Nomoro ya Selefounu le aterese ya moo o dulang kapa o sebetsang teng.

Ka mora moo, o tla fumana SMS e o netefaletsang hore o ngodisitswe, e leng se bolelang hore o se o emetse ho entwa. Ha letsatsi la hao la ho entwa le atamela, o tla fumana SMS e tla o tsebisa hore o tla entwa neng le hore kae. Haeba o se na selefounu kapa aterese ya imeile, o ka ya kopa thuso setsing sa bophelo bo botle.

#### **16. Ho etsahala eng ka dintlha tsa ka tseo ke faneng ka tsona ho EVDS?**

Dintlha tseo di thusa mmuso ho tseba hore ho tla hlokahala dienta tse kae ditsing tsa ho entela. Ka lebaka lena, sena se etsa hore ka letsatsi ho be teng ente tse lekaneng ditsing kaofela. Dintlha tsena di boele hape di thuse le hore re kgone ho buisana le wena moo ho hlokahalang teng. Ho feta moo, dintlha tsohle tse ho EVDS di sireletsehile ka botlalo, jwalo ka ha molao o laela jwalo.